

《奉禁加租碑》

吉澳奉禁加租碑位於天后廟的左牆邊上，原名為《奉兩廣總督閣部堂大人批行給示勒石永遠遵照額例碑》。這塊碑刻於嘉慶七年(1802)。當時在吉澳島上有漁民曾其捷，以年租十二千文錢向地主楊廷相租借土地搭建房屋，捕魚為生。但在嘉慶六年，楊廷相去世，其子楊名達將土地賣與另一地主張騰南，張騰南除了收取地租外，當曾其捷在島上割草灣船時，還要向其勒收三錢五錢不等，否則張騰南就聚眾抄掠。曾其捷向縣衙求助，要求取回公道，縣官判處曾其捷只需按租約交租一十二千文錢。但張騰南勾結衙差，滋擾更甚。



為此，曾其捷告到廣州府衙，廣州府正堂將此事稟告兩廣總督覺羅吉，查明真相，判處張騰南應遵照當年曾其捷與楊廷相租約之規定，每年收取十二千文錢，不得額外加增，如敢違抗，定即嚴究。並將此項判決刻石，安放於當眾處，以示知曉。

由於這塊石刻是判處租務糾紛，而結果是不許加租，所以鄉民就將之稱為【奉禁加租碑】了。

《奉兩廣總督閣部堂大人批行給示勒石永遠遵照額例碑》

署新安縣正堂加三級紀錄四次王 為背額苛酷，懇恩給示，勒石禁遏事。嘉慶七年五月初七日，奉 廣州府正堂福 信牌「嘉慶七年四月十一日奉 兩廣閣督部堂覺羅吉 批：「據該縣民曾其捷等赴轅呈稱；蟻等祖父世居吉澳孤洲，搭蓋房棲，捕魚營生。額承歲供楊廷相租錢一十二千文，相安年久，歷收票據。嗣因上年廷相之子楊名達，將租賣與巨族地棍張騰南，恃結縣工房蠹羅偉中，額外苛酷。蟻等所有草嶺、門坪、灣船沙灘，每勒要銀三錢五錢，否則統眾抄掠。叩縣。批；著原賣主楊名達稟覆。額租一十二千文，無異。奈案歸蠹棍工房職掌，任意舞弄，架捏蟻等抗租，誑縣瞞准拘訊，串差如虎，擾詐靡寧，情極。去年十月初一日，蟻等叩轅，荷批；抄呈。雖蒙府主上發縣示禁，無如案仍歸蠹承行。仇恨日深，反出票差，復拘蟻等，擾累更其。伏思蟻等貧民，海角孤洲，捕魚營生，朝討暮糧，誰敢與蠹棍詰訟。惟是額承定租照供，年久無欠，有原賣主稟覆案據，且被背額苛酷，遵則無所出息，妻兒待斃；不遵，捏稟抗租，囑差拘訊，未到公庭，先鎖押禁，天高莫聞。進退狼狽，無路投生。勢著瀝情，粘具姓名，再懇大憲，伏乞垂憐蟻等，照原供租，不甘與訟。俯賜給示禁遏，勒石孤洲，飭令照舊收錢壹拾貳

千文，毋許縣房蠹棍，苛額苛酷，捏抗拘訊擾累。庶捕魚居民，得便安業，永遠遵守，遺愛萬代等情。奉批；本案前經批仰該府查禁，因何仍任抗違？仰廣州府立即查明。」出示曉諭；飭令張騰南遵照原業主楊名達之父楊廷相從前歷收吉澳原額章程，每年額收租錢，毋許額外加增，苛索蛋戶居民，致滋擾累。仍將示禁日期申報 督憲，並報本府查考，毋再遲違。」等因。奉此，並據曾其捷、黃仕鵠稟同前情到縣，當批繳到花銀貯庫。卷查已故楊名達，前經稟覆所賣土名吉澳洲之處，實止額租一十二千文有奇。而張騰南呈控抗租，又不將買契繳驗，顯係額外加增。准先給示，遵照向額輸租，仍候吊契集訊，詳覆在案。除飭差吊契喚集訊詳外，合先出示曉諭。為此示諭業主佃戶人等知悉；嗣後張騰南止許遵照原賣主楊廷相章程，額收吉澳處所每年地租錢一十二千零式百文，毋得額外加增苛索等弊。如敢抗違，定即嚴究。至爾蛋戶居民、亦不得藉控短少，滋訟于累。各宜凜遵毋違。特示。

嘉慶七年五月二十三日示

發仰吉澳張掛曉諭刻石